

Pembangking anggap batal SBPA mainan politik
MalaysiaKini.com
March 8,2012

Walaupun menyambut baik pembatalan skim Saraan Baru Penjawat Awam (SBPA), pembangkang beranggapan tindakan itu secara tidak langsung membuktikan kepemimpinan perdana menteri menjadikan dasar negara sebagai mainan politik.

Timbalan Ketua Penerangan PKR (AMK) Najwan Halimi mendakwa, pengumuman Datuk Seri Najib Razak hari ini bertujuan menjadikannya modal bagi meraih sokongan demi pilihan raya umum yang akan datang.

"Justeru, dalam pada kita meraikan keputusan kerajaan pada hari ini, AMK tegas berpandangan bahawa polemik SBPA ini secara tidak langsung menzahirkan kelemahan kepemimpinan perdana menteri dalam mengurus serta melaksanakan dasar-dasar yang berkaitan dengan kepentingan perkhidmatan awam negara," katanya.

Najwan juga berkata, pembatalan dasar selepas diumumkan penguatkuasaan pelaksanaannya juga tidak pernah berlaku dalam sejarah perkhidmatan awam di negara ini.

"Mengapa SBPA sebelum ini diumumkan pelaksanaannya meski pun masih belum ada konsensus menyeluruh daripada golongan penjawat awam?" soalnya.

Laksana kembali lepas p'raya?

Sementara itu, Ketua Penerangan Pemuda PAS Riduan Mohd Nor pula menyifatkan pembatalan itu sebagai kejayaan rakyat memperjuangkan hak sehingga kerajaan terpaksa mengalah.

"Pemuda PAS melihat mungkin juga pembatalan SBPA adalah tanda terdesaknya perdana menteri dalam meraih simpati rakyat menjelang pilihanraya umum ke-13," katanya.

Riduan juga mengingatkan, belum tentu SBPA tidak akan dilaksana sekali lagi jika BN mendapat mandat lagi selepas pilihan raya umum yang akan datang.

"Pembatalan SBPA menjadi suatu pengajaran kepada perdana menteri dan kerajaan supaya setiap dasar yang melibatkan golongan bawahan, ianya perlu dibincangkan dahulu kepada mereka," katanya lagi.